



Progetu finantziau cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

## Sa crèsia de Santu Costantinu

Unu scanesu una diri fiat traballendu sa terra, candu totinduna est stètiu cassau e acapiau de is morus ca dd'ant bitiu a Costantinòpoli. Innoi in Costantinòpoli dd'ant fatu serbidori e depiat traballai a de diri e a de noti chentza de si podi pasiai e candu non nci-dda fadiat prus ddu scudiant a fusti po ddu fai traballai. Fiat una vida de inferru, ma una diri candu fiat crocau in terra, totu prenu de sàngui po is corpus ch'iat pigau, dd'est aparèssiu un'òmini bellu e mannu ca dd'at nau:

- Non ti disisperist ca is Morus non t'ant a podi aguntai me innoi po tempus meda, abarra siguru ca deus t'apa a liberai;

Apenas chi at acabau de nai custus fueddus s'òmini est sparèssiu de inni. Apustis de custu fatu e apustis de diris meda, una noti su scanesu, chentza de sciri comentis fessit acadèssiu, s'est agatau in sa praja de Portotorres.

In su matessi momentu ca est arribau, su scanesu iat atobiau s'òmini bellu e mannu ch'iat biu in Costantinòpoli ca si firmat e ddi narat:

- Cumenti t'ia promìtiu t'apu liberau; deus seu Santu Costantinu e t'apu liberau poita ca bollu a mi fraigai una crèsia. Piga custu sacu de dinai, bai a Sèdilo e fraiga-mì sa crèsia in su monti Jesi e aici sa bidda de Sèdilo at a essi sèmpiri libera de dònna maladia.

Su Scanesu dd'at ascurtau e at fraigau sa crèsia po su santu ca est miraculosu meda e a cantu parit ddi praxit abarrai cun is sedilesus mancai is scanesus ddu bollant cun issus.

## Su miràculu de Nostra Sennora de Bonacatu

A Bonacatu dònna annu, su dexiotu de su mesi de Cabudanni s'afestat Nostra Sennora de Bonacatu. Un annu in custa festa ddoi fiat genti meda, ddoi fiant paraderis de scarteddus e ddoi fiant fintzas paradas de farramenta e is giòvunus baddànt su baddu de utlurinu (est una calidadi de ballu tundu) tzerriendu meda.

Totinduna, a s'ora de sa missa manna su sagrestanu s'acostat a sa parada de is pratus e ddi preguntat unu pratu po fai sa circa aintru de sa crèsia ma su bendidori dd'at arraspustu:

- Non potzu, non biris ca apu bèndiu aici pagu?

Ma su sagrestanu ddi narat:

- Est po Nostra Sennora de Bonacatu. Donai-mì su pratu ca Nostra Sennora s'at a arrecumpentzai e s'at a fai is gràtzias chi disigiais. Non mi nareis ca no.

Su Paraderi, ca fintzas a intzandus iat fatu su surdu s'est arrennegau e at nau a su sagrestanu:

- Non tengu cosa de donai a perunu, e Nostra Sennora non donat cosa de papai a cussas cuatro criaduras chi tengu in domu chentza de mamma e abbandonadas;

Su sagrestanu, intendendu s'òmini aici arrannegau, ddi girat palas e si-nc'andat de pressi. Ma non fiat nimancu arribau a s'eca de sa crèsia ca unu grandu bentu si-ndi pesat e nci fait arrui totu is pratus e ddus fait bolai fintzas conca a s'eca de sa sagrestia, e ancora oi si birint ca funt biancus e arrùbius.